



*Møre bispedømme 40 år*  
**Årsforteljing**  
**2023**



DEN NORSKE KYRKJA  
Møre bispedømme





Biskop  
Ingeborg Midttømme



Leiar Møre bispedømeråd  
Arnt Ove Tenfjord

## Eit ungt bispedøme med djupe historiske røter

I 2023 feira Møre bispedøme 40 år. Møre bispedøme er yngst av bispedømme i Den norske kyrkja, men grunnlaget og åndsarven i dette bispedømet høyrer til dei eldste og viktigaste røtene for kristen tru i Noreg.

Ei historie vi som kyrkje vil formidle til nye generasjonar gjennom kyrkjeleg undervisning og læring. Kyrkja vil gi viktige bidrag til skulen sine læringsmål og samtidig auke kunnskapen om dei kristne fortellingane, høgtidene, kyrkjebygget sin historie, utsmykking av kyrkjerommet, formidling av salmeskatten og pilegrimsvandring.

Møre bispedøme har 97 kyrkjelydar. I bygder og byar i heile Møre og Romsdal er kyrkja til stades. Synleg i form av 120 kyrkjebygg, ei rekke gravplassar, kapell og seremonirom. Synleg i form av gudstenester, konfirmasjon, vigsel og gravferd. Kyrkjene er og ein viktig kulturarena med meir enn 100.000 deltakarar.

Det er ønskjeleg å synleggjere kvardagskyrkja meir. Kyrkja er også babysang, omsorg for dei som fell utanfor, for menneske i sorg eller med psykiske utfordringar og dei som slit med einsemd.

Medlemsundersøkinga for kyrkja i Møre og Romsdal viser at kyrkja står sterkt og er noko som folk hegnar om og sluttar opp om.

Kyrkja er ein stor organisasjon i sivilsamfunnet som har ressursar i lokalsamfunn i heile Møre og Romsdal. Både stat og kommune kan gjere seg nytte av kyrkja i høve til å møte utfordringar. Kyrkja er òg ein viktig aktør i arbeidet med beredskap og sikkerheit, i møte med kriser for den enkelte, til katastrofar som rammar verksemdar eller heile lokalsamfunn. Også i den tryggleikspolitiske situasjonen vil kyrkja spele ei rolle.

Kyrkja ønskjer eit aktivt samarbeid med organisasjonar som arbeider med misjon, diakoni og barn- og unge. Vi meiner vi kan bidra til å bli meir for fleir når vi samarbeider med andre kristna trussamfunn lokalt og når vi skapar dialogarenaer på tvers av tru og livssyn.

### **”Kyrkja i Møre og Romsdal står sterkt, og folk hegnar om ho”**

Til slutt: Kyrkja er meir enn kyrkjebygg og gravplassar. Folkekyrka i Møre og Romsdal er til stades med kompetente tilsette, engasjerte medlemmer av sokneråd, fellesråd og bispedømeråd og frivillege som står på til beste for kyrkja og lokalsamfunna!



## Kulisteinen - Noregs dåpsattest

Kulisteinen på Smøla frå ca. år 1000 har ein keltisk kross og ei runeinnskrift som fortel:

«Tolv vintrar hadde kristendomen vore i Noreg».

Kulisteinen blir omtala som Noregs dåpsattest.

Snorre fortel at Håkon den gode ”bygde kyrkjer på Møre” og mellomalderkyrkjene rundt om i bispedømet vitnar om tidleg kristen verksemd.


Gjennom hundreåra har kristen tru og verksemd prega området, oppretthaldehalde gudstenestelivet og gjeve rike uttrykk i kunst, arkitektur, litteratur, musikk - og framfor alt i menneska sine hjarte.

Møre bispedøme er difor ein kontinuitetsbærar.

Bispedømet vart til gjennom ei deling av bispedøma Nidaros og Bjørgvin. Den første biskopen var Ole Nordhaug, deretter Odd Bondevik. Ingeborg Midttømme er biskop i dag.

# Meir himmel på jorda

Den norske kyrkja er ei vedkjennande, open, tenande, og misjonerande folkekyrkje, som vitnar i ord og gjerning om frelse, fridom og von i Jesus Kristus.

<b>Strategi for Den norske kyrkja for 2022–2029</b>	 <b>Kyrkja opnar rom for tru</b>	 <b>Kyrkja er der livet vert levd</b>	 <b>Kyrkja er meir for fleire</b>
 <b>Kyrkja for den enkelte</b>	Forkynner evangeliet til menneske gjennom heile livet	Styrkjer kyrkja som kulturarena og forvaltar av kulturarv for alle generasjonar	Gjev tilhøyrsløse og skapar gode møteplassar og fellesskap fysisk og digitalt
 <b>Kyrkja i samfunnet</b>	Fremjar verdiar som utfordrar og som byggjer eit godt samfunn for alle	Bidreg til å verkeleggjere berekraftsmåla – lokalt, nasjonalt og globalt	Motverkar utanforskap og utforskar nye måtar å vere kyrkje på
 <b>Kyrkja som organisasjon</b>	Styrkjer gjennom si organisering ei levande og nærverande folkekyrkje	Samhandlar med organisasjonslivet, andre trus- og kyrkjesamfunn, offentlege, private og ideelle aktørar	Skapar ein mangfaldig, rekrutterande og inkluderande arbeidsplass og frivilligarena



# Kyrkja i Møre i tal

Tre av fire innbyggjarar i Møre og Romsdal er medlemmer i Den norske kyrkja. Til saman om lag 200.000 menneske.

På kvart eit nes og i kvar ein fjord er det ein kyrkjestad og og ein kyrkjelyd.

Dei store og viktige stundene i livet er omramma av kyrkja: dåp, konfirmasjon, bryllaup og gravferd. Kvart år blir 1700 born døypte og 2300 ungdommar konfirmererte i kyrkjene i Møre.

Mange er aktive deltakarar i kyrkja, anten som tilsett eller i frivillig arbeid. Kyrkja i Møre har til saman 420 tilsette og nær 6000 frivillige.

Dei 120 kyrkjene i Møre er kyrkjelyden sin faste møtestad til gudstenester. Kvart år kjem nær 300.000 menneske i alle aldrar til gudsteneste i den lokale kyrkja her i bispedømet.

Kyrkja er også arena for ei stor mengd konsertar og kulturarrangement: Kvart år deltek nær 100.000 menneske på slike arrangement.

Tal medlemmar

# 199 919

73,9 % av innbyggjarane i  
Møre og Romsdal





# Kyrkja i Møre

Den norske kyrkja er ei landsdekkande folkekyrkje, delt inn i 11 bispedøme. Kwart bispedøme har sin eigen biskop, og eit valgt bispedømeråd, som representerer og leier arbeidet i sitt område. Kwart bispedøme er delt inn i prosti, fellesråd og sokn.

**MØRE BISPEDØME**  
 Tal geografiske sokn: 95  
 Tal fellesråd: 26  
 Tal prosti: 6

**Soknet** er den grunnleggande eininga i Den norske kyrkja og den geografiske ramma om kyrkjelyden. Sokna varierer i geografisk utstrekning og tal medlemmar, men kvart sokn har minst éi kyrkje. **Soknerådet** blir valt mellom kyrkjemedlemmane i soknet og har som grunnleggande oppgåve å vekkje og nære det kristelege livet i soknet.

Alle sokna innanfor ein kommune utgjør eitt **fellesrådsområde**. **Kyrkjeleg fellesråd** består av soknerådsrådsmedlemmar frå kvart sokneråd i kommunen, ein prost eller annan prest og kan i tillegg ha ein representant valt av kommunen. Fellesrådet har i hovudsak økonomiske og administrative oppgåver på vegner av sokna, og tek også i vare sokna sine interesser overfor kommunen. Kyrkjeverja er dagleg leiar i fellesrådet.

**Prostiet** er ei gamal kyrkjeleg inndeling, og i dag er prostiet primært tenestedistrikt for prestane. Prosten leier prestetene i prostiet, og prosten skal også samvirke med dei kyrkjelege råda i prostiet. Dei fleste prostia omfattar i dag fleire kyrkjelege fellesrådsområde. Nokre stader er det samanfall mellom prosti og fellesrådsområde, og nokre få fellesrådsområde har fleire prosti. 8



## MOLDE DOMPROSTI

**16** sokn  
**3** fellesråd  
**6** kyrkjer

## NORDRE SUNNMØRE PROSTI

**24** sokn  
**5** fellesråd  
**25** kyrkjer

## SØRE SUNNMØRE PROSTI

**20** sokn  
**7** fellesråd  
**20** kyrkjer

## YTRE NORDMØRE PROSTI

**12** sokn  
**4** fellesråd  
**16** kyrkjer

## INDRE NORDMØRE PROSTI

**13** sokn  
**4** fellesråd

## INDRE ROMSDAL PROSTI

**11** sokn  
**2** fellesråd  
**14** kyrkjer





Tal døypte 2023:

1 708

73,6 % av fødde

Ned frå 1866 døypte i 2022



Tal konfirmerte 2023:

2 306

Tal på 15-årige medlemmar:

2 559

15-årige medlemmar siste år:

Ned 2,59% frå 2022

Tal gravferder 2023:

2 162

92,4 % av døde

Gravferder i sokna sine kyrkjer:

1944



Tal vigslar 2023:

350

Ned frå 399 i 2022





## Gudstenester i Møre

# 3 339

Ned frå 3 443 i 2022

## Deltakarar gudstenestar

# 286 252

Opp frå 273 891 i 2022



Foto: Bo Mathisen



Foto: Bo Mathisen

## Frivillege

# 5 762

Opp frå 5 625 i 2022

## Tilsette totalt i bispedømmet

# 420

## Faste preststillingar

# 75

Del tilsette kvinner i 2023: 64,7 %

Vigslingar i 2023:

5 prestar (4 kvinner, 1 mann)

2 diakonar (2 kvinner)

## Konsertar og andre kulturarrangement

# 825

I 2022: 770

## Deltakarar konsertar og andre kultur- arrangement


# 91 245

I 2022: 77 441



Foto: Bo Mathisen





# Kyrkja opnar rom for tru

**Den norske kyrkja i Møre vil opne rom for tru og forkyne evangeliet for menneske gjennom heile livet.**

**Kyrkja opnar rom for mange, gjennom aktivitetar med ulike former for nærvær i lokalsamfunn og storsamfunn.**

**Kyrkja opnar rom særleg knytt til viktige hendingar i livet, som dåp, ungdomstid, vigslar og gravferd.**





## Dåp

Dei fleste som søker opp Den norske kyrkja har starta ei livslang tilknytning gjennom dåpen. Derfor er dåpstalet avgjerande for kyrja. Eit fleirtal av medlemmane vel dåp for sine barn.

Dåpen gir grunnlag for å bli medlem av Den norske kyrkja – i den lokale kyrkjelyden – og i den verdsvide kyrkja.

I Medlemsundersøkinga for Møre bispedøme i 2023 oppgir 84% at dei ville valt kyrkjeleg dåp om det var aktuelt i dag.

I Møre bispedøme vart 1707 barn døypte i 2023, eller 72,9% av dei fødte.

Det er ønskeleg å ha ein lav terskel for å velje dåp. Ein del kyrkjelydar har drop-in-dåp, men det vanlegaste er framleis dåp i hovudgudstenesta søndag kl. 11. Ein annan måte å melde seg til dåp, er gjennom den nasjonale nettløysinga på [skjerikyrkja.no](https://skjerikyrkja.no)



## Konfirmasjon

Kyrkjeleg konfirmasjon har historisk sett stått sterkt i Møre bispedøme. I 2023 valde 90% av dei døypte ungdommane å konfirmere seg i kyrjka. Det vil seie 2306 av 2559 ungdommar. Her skil Møre seg ut med absolutt høgast oppslutning i landet.

Konfirmasjonstida er ei tid for kyrkjelydane til å bli kjende med breidda av alle 15-åringar.

Gjennom konfirmasjonen stadfestar Gud det som vart lova i dåpen – eg er med!

Kyrkja bidrar med noko som er annleis og større, noko som kan gje håp i ei krevjande tid og ei tru som ber. Kyrkja må vere tilgjengeleg for alle som ønskjer konfirmasjon. Det krev både praktisk innsats, kompetanse og ressursar for å legge til rette for ulike behov.

## Gravferd

Gjennom kyrkjebygget, seremonien og musikken opnar gravferda rom for tru for dei etterlatne. Frå 1. januar 2021 blei det sett i gong teljing av dei som møter fram ved kyrkjeleg gravferd. Det er tradisjon i Møre og Romdal å ta del i gravferder. Det er viktig med nærleik og tryggleik i dei kyrkjelege gravferdene, frå den første kontakta etter dødsfallet, til gjennomføring og tilbod om oppfølging etter at gravferda er over. Kyrkjelege gravferder har mykje å seie for oppslutning om kyrkja.

Talet på gravferder er stabilt. Møre ligg øvst mellom bispedøma med omsyn til at ein svært høg prosent av kyrkjemedlemmane som dør, ønskjer kyrkjeleg gravferd.

I 2023 var det 2335 døde totalt i bispedømet, og 2035 kyrkjelege gravferder.



Foto: Malin Longva





Foto: Bo Mathisen

## Vigslar

Det var 350 vigslar i kyrkjeleg regi i 2023. Totaltalet går noko ned frå fjoråret. Dei mest brukte vigselkyrkjene held posisjonen sin, og framleis er det Borgund kyrkje som har flest vigslar i bispedømet (34). Deretter følgjer Ålesund kyrkje (22). Det er verdt å merke seg at deretter følgjer Ulstein (17). Soknet har hatt fokus på drop-in vigsel og arbeid målretta for å auke vigselstallet. Det er fint å sjå at arbeidet fører til gode resultat.

Den vidare rekkefølga er Giske (14), Domkirka (12), Kristiansund (11), Ørsta (11) og Øye og Ranes sokn (8)

***”Kyrkjeleg konfirmasjon har historisk sett stått sterkt i Møre. I 2023 valde 90% kyrkjeleg konfirmasjon”***

## Gudstenester

Gudstenesta i Den norske kyrkja er det sentrale rommet for tru. Gudstenester går tradisjonelt føre seg på søn- og helgedag i kyrkja. Det er blitt meir vanleg å ha gudstenester også på kvardagar. Gudstenester blir også gjennomført i friluft, på museum eller i andre offentlege rom.

Gudstenester krev store ressursar frå tilsette og frivillige. Mange gudstenester når ein aldersmessig breidde ved at konfirmantar eller barnekor deltek, eller gjennom å knyte seg til ein aktivitet i trusopp-læringa. Men det er også mange gudstenester



Foto: Ole Syltebø

som i all hovudsak treff kyrkjemedlemmar i beste-foreldre-generasjonen. Kyrkja si framtid blir avgjort i stor grad av yngre medlemmar: Ungdomar og unge vaksne gjer seg opp ei mening om kyrkja er aktuell for dem, og førstegongsforeldre avgjer om dei vil døype borna sine.

## Samisk kyrkjeliv

Møre bispedøme er del av det sørsamiske området. Fleire stadnamn, særleg på Nordmøre, har truleg samisk opphav. Bispedømet ønskjer å utvikle kyrkjelege tradisjonar knytt til det samiske i gudstenester og markering av merkedagar.

Møre bispedøme arbeider saman med resten av Den norske kyrkja med rapporten frå Sannhets- og forsoningskommisjonen. Eit e-læringskurs om sanning og forsoning frå Kyrkjeleg utdannings-senter blei lansert i 2023, og er tilgjengeleg for tilsette i bispedømmet og landet elles.

***”Gudstenesta er det sentrale rommet for tru. Kvart år er nær 300.000 deltakarar til gudsteneste i kyrkja i Møre”***

7 sokn i Møre bispedøme hadde gudstenester med samisk innslag i 2023. Det var totalt 68 gudstenester med samisk innslag i løpet av året.



## Ei berande tru: – trusopplæring for born og unge i Den norske kyrkja

Kyrkjeleg undervisning og læring er tett knytt til kyrkja sitt oppdrag. Gjennom aktivitetar i alle kyrkjelydar i bispedømmet blir barn og unge kjent med kristen tru og tradisjon, kristen praksis, bibeltekster og salmar. Slik får dei reiskapar til eigen livstolking og til å ta eit sjølvstendig val om å høyre til i Den norske kyrkja.

I Møre er det ei stabil høg oppslutning om dei tidsavgrensa trusopplæringstiltaka. Døme på slike tiltak kan vere utdeling av fireårsbok, Tårnagentar og Lys Vaken. Andre trusopplæringstiltak som samlar barn og unge regelmessig over lengre tid, mellom anna kor og klubb, viser også ei gledeleg auke i oppslutning. Dette syner at det blir jobba godt og at det er gode relasjonsbyggjande fellesskap rundt om i kyrkjelydane.



Foto: Bo Mathisen

Dei rapporterte tala i årsstatistikken for 2023 syner at dei bynære kyrkjelydane har noko mindre oppslutning om trusopplæringstiltak særleg frå åtte-årsalderen og oppover. Kva som er årsaka er nok avhengig av fleire faktorar, mellom anna konkurrerande arrangement og tilbod, men også utfordringar med sjukefråvær og rekruttering av tilsette lokalt i fellesråda. Framover blir det viktig og arbeide langs fleire aksar.

Rekruttering- og kompetansehevande tiltak vil vere ei viktig prioritering. Eit anna grep er å forsterke og foredle kyrkja sin eigenart.

Kanskje er tida og komen for i aukande grad å tenkje samarbeid på tvers av sokn og fellesråds grenser, tverrfagleg samarbeid og ei orientering mot meir organisk frivilligheit.




Foto: Bo Mathisen

For å få dette til, er det mellom anna viktig med gode målformulerte tiltaksbeskrivingar som gjer tilsette og frivillige i stand til å gjennomføre planlagde tiltak.

Vi ser også at dei som klarar å ha eit trusopplæringstilbod som forsterkar skulen sine læringsmål, samt har eit auka fokus på skule-kyrkje samarbeidet, lukkast betre med oppslutninga til trusopplæringstiltaka dei tilbyr barna i skulealder.

Bibelforteljningane er slitesterke, og saman med trus-praksis og dei historiske og kulturelle linjene kan vi saman byggje ei sterk og levande kyrkje for framtida.

**2 773 barn og unge deltok på baby-/småbarnssong og søndagsskule i kyrkja sin regi i 2023**



# Kyrkja er der livet vert levd

Den norske kyrkja er til stades i lokalsamfunn i heile Møre og Romsdal. Kyrkja møter menneske der dei er, og bidreg med kultur og kulturarv, tilhørsle og identitet, sosialt arbeid og støtte til dei som strevar.

Den norske kyrkja er også ei misjonerande folkekyrkje som samarbeidar med aktørar over heile verda.







Foto Yngve Lie

## Pilegrim i Møre

Møre bispedømme legg aktivt til rette for kyrkjelege aktivitetar i ramma av ei aukande pilegrimsverksemd. I Møre bispedømme er det to godkjente pilegrimsleder; Kystpilegrimsleia og Valdalsleden. Regionalt pilegrimssenter på Smøla er no godt etablert, og bidrar til å styrke pilegrimsfeltet i bispedømmet.

## Valdalsleden

Valdalsleden er ei led frå fjord til fjell, frå kyst til innland. Ei led i fotspora til Olav den Heilage. Då han rømte landet vinteren 1028-1029 drog han sine skip på land i Valldal og derfrå gjekk han over fjellet til Lesja og Dovre. Det er denne ruta Valdalsleden følgjer. Leden blei offisielt opna hausten 2015. Valdalsleden startar på bryggja i jordbærbygda Valldal og går over til Dovre, der den møter Gudbrandsdalsleden.

## Kystpilegrimsleia

Kystpilegrimsleia er ei spektakulær og vakker reise langs kysten med fjordar, øyer, holmar og skjær, som tek opp att og brukar mellomalderen si seglingslei frå Rogaland til Trondheim. Leia blei offisielt opna av preses for Den norske kyrkja på Smøla i 2018. Langs heile kystleia finn vi kyrkjer og heilagstader, spor etter den tidlege kristninga av landet, kongsgardar og tingstadar, gamle handelsstadar og fyrstasjonar, i tett sameksistens med dagens kystsamfunn. Kyrkjelydane på dei seks nøkkelstadane langs Kystpilegrimsleia i Møre er involverte i dei lokale nøkkelstadgruppene, og deltek aktivt inn mot å vidareutvikle tilbodet til pilegrimmar på kvar nøkkelstad.



## Konsertar og kulturarrangement

Konsertar og kulturarrangement er svært viktig for å opne kyrkja for fleire. Møre bispedømme er eit kulturbispedømme, og i 2023 deltok om lag 92 000 på ulike konsertar og kulturarrangement i kyrkjene våre, ein auke på 18% samanlikna med året før. Kyrkja i Møre er dermed ein viktig aktør i kulturlivet i vårt område. Mange stader er kyrkja den einaste store kulturarenaen i lokalsamfunnet. Kyrkjebygga kan sjåast som kunstgalleri, der ulike kunststartar er representert med eit tidsspenn på fleire hundre år. Kyrkjebygga er eit stort og viktig bidrag til arkitektur og kulturarv i vårt område. Kyrkja med sine instrument og sine dyktige kyrkjemusikarar inviterer til musikalsk utfolding for menneske i alle aldrar både til gudstenester og kyrkjelege handlingar, og til kor- og konsertverksemd. Med sitt kunst- og kulturarbeid ønskjer kyrkja å vere ein offensiv kulturberar og aktør. Utøvande kunstnarar og produsentar blir derfor invitert inn til samarbeid som tek eit breitt spekter av kunstformer og uttrykk i bruk.

## Kor for born og vaksne

I kyrkjene i Møre var det i 2023 registrert 78 kor for barn og vaksne, med til saman 1675 medlemmer. Etter ein krevjande periode under pandemien viser tala at ein er på god veg tilbake til aktiviteten på dette feltet frå tida før 2020.




Bilete: Marit Kalsvik

## Jubileumsseglas

I samband med 40 års markeringa for Møre bispedømme blei det gjennomført ein jubileumsseglas frå Herøy til Smøla, der alle dei seks nøkkelstadane langs Kystpilegrimsleia i Møre blei besøkt.

Til rors sto prost Sindre Stabell Kulø og domkantor Magnus Moksnes Myhre. Biskop Ingeborg Midtømme og påtroppande domprost Grethe Lystad Johnsen hadde fast hyre på heile turen, og fekk selskap av fleire andre på dei ulike etappene. Det blei ei festreise som inkluderte arrangement og musikalske innslag på dei seks nøkkelstadane. Kulturkveld på Herøy gard, program i Borgund kyrkje, tablå frå Giskespelet, historisk tilbakeblikk på Veøy, pilegrimsvandring og messe i Kvernes stavkyrkje, konsert i Grip stavkyrkje og pilegrimsvandring til Kulisteinen var nokre av opplevingane.





Tingvoll kyrkje og Straumsnes kyrkje arrangerte døgnopen kyrkje i samband med feiringa av Møre bispedømme sine 40 år i 2023.

## Opne kyrkjer

Opne kyrker betyr at kyrkjene er opne i eit visst tidsrom for kven som helst. Alle som ønskjer det kan komme innom for å tenne eit lys, be ei bøn, sjå seg rundt, eller berre vere i rommet. Dette blir i større grad praktisert i andre land, og det er eit ønske at fleire kyrkjer i bispedømmet skal være opne.

I 2023 var det 42 sokn som hadde opne kyrkjer, og totalt tal på opne kyrkjer var 1615. Tala er stabile frå år til år, og ein har ikkje hatt ønska framgang på dette feltet. Det vil difor vere eit prioritert område å motivere og skape forståing for kvifor det er viktig å prioritere at kyrkjene skal være mest mogleg opne og tilgjengelege, også når det ikkje er arrangement i kyrkjene.

Under jubileumshelga for Møre bispedømme sitt 40 års jubileum blei alle kyrkjelydar oppmoda om å opne kyrkjene, og mange viste stor kreativitet og engasjement for å få til dette. På heimesida til Møre bispedømme kan ein sjå alle arrangement som blei laga til.



Foto: Møre bispedømme

Møre bispedømme starta tiltaket Havets dag i 2022, og dette vart halt fram også i 2023. I bispedømmet vårt har vi ein lang tradisjon for å feire skaparverkets dag, anten i juni eller på hausten. Alle kyrkjelydar blir oppmoda om å tematisera Havets dag. Både i 2022 og 2023 blei skaparverkets dag feira som Havets dag på andre pinsedag eller andre dagar i juni. Fleire stader i bispedømmet blei det gjennomført gudsteneste nær sjøen, med fokus på vern om skaparverket og havet.





## Fleire diakonale tilbod

Det har dei siste åra vore ei auka merksemd og veking av diakonalt arbeid, både i Den norske kyrkja og i samfunnet. Berekraftmåla har blitt felles mål.

Diakoni er kyrkja si omsorgsteneste og er slik sett evangeliet i handling med fokus på nestekjærleik, inkluderande fellesskap, vern om skaparverket og kamp for rettferd. Dei siste åra har kyrkja sentralt lyst ut tilskotsmidlar til ulike diakonale prosjekt. Det er flott å sjå at kyrkja lokalt i Møre, gjennom sine tilsette og frivillige, utgjør ein forskjell for mange og at tilskotsmidlane raskt omsettast til aktivitet for dei som trenger det.

I Møre bispedømme er talet på tilsette diakonar og diakonimedarbeidarar stabilt. Tal for 2023 syner at vi i Møre har 21 diakonar/ diakonmedarbeidarar med økonomisk støtte frå bispedømmet som til saman tener 56 sokn. Om lag 2/3 av sokna har utarbeidd ein lokal plan for diakoni for sitt sokn.

Saknet og ønsket etter diakonalt tilsette i dei sokna som ikkje har det er stort, og for stor del ei økonomisk utfordring. Her vert ein oppmoda til å tenkje kreativt. Kanskje kan ein samarbeide på tvers av fellesråd eller finne ei løysing om - og i samarbeid med - kommunen lokalt.

Eit slikt kreativt samarbeide er samtaletilbodet 13+ for barn og unge mellom 13 og 20 år i Vestnes kommune. Dette er ei aldersgruppe som i aukande grad treng merksemd. Ungdommane blir her møtt av eit tverrfagleg team av frivillige med relevant utdanning og erfaring innan psykososial omsorg bestående av sjukepleiarar, vernepleiarar, psykolog, helsefagarbeidar, prest og psykotraumalog.

## ***Med tilsette og frivillege har kyrkja strukturar som gjer at midlar frå det offentlege raskt kan settast om til aktivitet for dei som treng det***

Vi ser at det framleis er ei utfordring med vakanter diakonale stillingar. Dette skuldast fleire ting, mellom anna profesjonslekkasje og at det er få kvalifiserte søkarar.

Det er nødvendig å gjere grep i rekrutteringsarbeidet for å stimulere til at fleire utdannar seg. Nasjonalt, i samarbeid med dei kristne utdanningsinstitusjonane, blir det difor lagt til rette for deltidsstudier og erfaringsbasert master. Då kan ein parallelt med jobb utdanne eller vidareutdanne seg. Her kan kyrkjevevane søkje kvalifiseringsmidlar.

## Fellesskap og møteplassar for flyktingar og innvandrarar

Den norske kyrkja ønskjer å inkludere og invitere inn menneske som kjem til Noreg som innvandrarar og flyktingar. I mange lokalsamfunn er kyrkjelelydane i Den norske kyrkja det einaste kyrkjelege tilbodet. Dette utfordrar korleis kyrkja arbeider med sine fellesskap og med eigen kultur. I Møre driv mange kyrkjelydar eit aktivt arbeid inn mot denne gruppa, til dømes konsertar og kulturarbeid, internasjonal middag og språkkafé.





## Samarbeid med skular og barnehagar

Som trussamfunn har vi eit ansvar som kulturberarar. Det er vanskeleg å forstå eldre historie, litteratur, kunst og musikk utan kjennskap til kristen tru. Ved å få innsikt i kristendommen kan ein få innsikt i korleis religion og livssyn inngår i historiske prosessar, og heng saman med samfunnsendringar og kulturarv knytt mot identitet. Her ønskjer vi å vere ein ressurs og ein «læringsforsterkar».

Dei fleste av sokna våre tilbyr høgtidsvandringar for borna i barnehagen og skulen. Her blir dei gjennom drama og undervisningsopplegg, som er tilpassa dei nye læreplanane i KRLE-faget, invitert til aktiv elevmedverknad og engasjement gjennom bevegelse som metode, i samspel med munnlege forteljingar.

I samarbeidet med skulen er «Likeverdighetsprinsippet» - med respekt for og anerkjenning av mangfald - og eit transparent og føreseieleg samarbeid viktig for oss. Dette er noko vi arbeider aktivt med.



Dei nye læreplanane frå 2020 gir kyrkja eit større handlingsrom til å samarbeida med skulen.

Det er i auka grad lagt opp til at elevane gjennom eit innanfrå- og utanfrå-perspektiv, dialog og refleksjon skal utvikla ein mangfaldskompetanse i møte med ulike livssyn.

Dei tverrfaglege tema, som mellom anna livsmeistring og berekraftig utvikling, opnar også opp for samarbeid. I dei mange ulike barnehage- og skule-kyrkje-samarbeida i bispedømmet bidreg kyrkjelydane mellom anna med formidlingsopplegg om kunst, kulturarv og lokalhistorie, kyrkjemusikk og tema knytt til identitet, død og sorg, håp, kristne og folkelege tradisjonar og høgtider.

### Skulegudstenester

I ei gudsteneste blir evangeliet forkynt og har slik sett eit anna perspektiv enn anna skule – kyrkje samarbeid. Her får elevane erfare og observera korleis tru blir praktisert.

Læreplanane opar for at skulegudstenester er ein del av skulen si verksemd.

### Læreplanen opnar for større handlingsrom i samarbeidet mellom skule og kyrkje

## Kommunikasjon og samfunnskontakt

### Mediabiletet

Kommunikasjonsarbeidet i 2023 har vore variert og mangfaldig. Både lokalt og regionalt blir det brukt ressursar på å vere tilgjengelege for media, med å gje korrekt informasjon, stille til intervju og formidle gode historier. Pressemeldingar frå bispekontoret har mellom anna fokusert på 40-års jubileum, medlemsundersøking, sannings- og forsoningskomiteen sitt arbeid, konsertar og kulturarrangement, Kyrkjevalet, bispedømmeråd og bispedømmerådssakar, høgtider, ny domprost, ulike nasjonale kampanjar og nokre av biskopen sine aktivitetar.

### Kampanjearbeidet

Kommunikasjon er på mange måtar kyrkja sin ryggmargsrefleks. Misjonsbefalinga viser oss retninga bodskapet skal ha, og «alle folkeslag» viser breidda.

Den norske kyrkja må konkurrere om merksemda med alle andre aktørar som tilbyr aktivitetar og fellesskap. Difor blir det kvart år gjennomført fleire kampanjar, som skal auke synlegheita og bidra til at fleire kan ta informerte val om dei ønskjer å nytte seg av kyrkja sine tilbod.

I 2023 blei det gjennomført kampanjar mellom anna kring dåp, konfirmasjon, bryllaup, påske, allehelgen og jul.

Kampanjane oppnår generelt mål om meir synlegheit. Svakheiter ved kyrkja sitt kampanjearbeid er fråveret av felles nettsider/-løysningar, nasjonale påmeldingsløysningar og felles tidspunkt, noko som kan føre til at ikkje alle tek i bruk kampanjemateriell. Frå bispekontoret prøver vi å gjere det vi kan på regionalt og lokalt nivå. Kampanjar blir meir effektive når det same skjer over heile landet samtidig, og når flest mogleg er med og løftar i lag.

### Samfunnskontakt

Møre bispedømme er del av sivilsamfunnet, og gjennom biskop deltek vi tidvis aktivt i dialogen med styres- og ordensmakta. Mellom sakene som var viktige i samfunnskontaktarbeidet i 2023, var dei ulike møta med sivilsamfunnet på visitasar, kyrkjeasylantsaka i Herøy, beredskapskommisjonen sitt arbeid, møte med Statsforvaltar og deltaking i Executive Committee i Kirkenes verdensråd (WCC).



Foto: Kirkerådet



# *Rom for deg*

*Den norske kyrkja er Noreg si folkekyrkje,  
med 3,5 millioner medlemmar.*

*Med 76 000 frivillige, 8000 tilsette  
og 1600 kyrkjebygg, er kyrkja til stades  
i heile landet for å skape  
meir himmel på jorda!*



**DEN NORSKE KYRKJA**  
Møre bispedøme